

四書典故辨正續

四書典故辨正續卷三

溧陽周柄中理衷氏著

子游

附見巫咸巫賢

張守節史記正義謂巫咸及子賢本吳人。見商本紀及天官書注。余前編因論子游而及之。以爲吳中人物。當以二子爲稱首。顧猶疑之。弗敢質也。及覽今山西解州夏縣志。稱咸爲縣人。縣東五里有巫咸山。咸父子所隱居處。山以是得名。而辨史記正義之非。余按古之稱巫咸者。有堯時之醫。有商時之相。他若歸藏莊列世本山

海經等書言巫咸者不一。夏縣之山卽以人得名。何。旨。而。定。其。爲。父。王。家。之。巫。咸。耶。夏縣本漢安邑。班氏地理志安邑下云。巫咸山在南。郭璞巫咸山賦序云。蓋巫咸者。實以鴻術爲帝堯醫。生爲上公。死爲明神。豈封斯山而因以名之乎。巫咸果以商相得名。景純作賦。便應及之。顧以爲帝堯醫。不言商相。是晉時無此說也。水經注。鹽水出東南薄山。西北流逕巫咸山北。善長注經。于古人遺跡。無所不誌。而巫咸不及商相。是北魏時無此說也。惟宋大觀三年。封商相巫咸河東公。繫之夏縣。蓋自。

此始則其來也近矣。若乃以爲吳人。則見於梁蕭統招  
眞治碑。越絕書。虞山巫咸所出。後漢郡國志。吳郡吳縣  
有虞山。巫咸山。是自漢以來。已有此說。較夏志所稱。獨  
爲近古。然則張守節之說。信有徵矣。

魯人爲長府

路史云。長府。昭公之所居也。公之二十五年。欲逐季氏。  
居于長府。九月戊戌。伐季氏。是故季氏惡之。欲改爲長  
府。閔子騫曰。仍舊貫。如之何。何必改作。以言長府。自爾。  
又何必改作。以自彰其不韙哉。此孔子所以聞之而發。

言必有中之語。蓋亦嘉其深中季氏隱也。方昭公之出也。平子禱于煬宮。故九月立煬宮。由此觀之。則其欲改爲長府。意可知矣。愚按長源好奇。往往多僻論。此條亦未免穿鑿。而煬宮一證。雅善附會。亦新而不害于理。可爲時文家助一談柄。郝京山云。初魯昭公與邠昭伯謀伐季氏。公居長府。事不克。公奔晉。薨于乾侯。今改作者。季氏恨其爲昭公發難之地。以爲不祥。議變置也。與作煬宮溝墓道意同。此亦用路史之說。

鼓瑟希

鼓瑟希。總記瑟聲非承問而希也。禮羣居五人則長者必異席。鄭註席以四人爲節。因宜有所尊。孔疏既長者一人異席。餘則四人矣。公食大夫禮云蒲筵常丈八尺加八尺。崔席尋八尺。此以蒲席者。故得容四人。今四子侍坐。夫子異席。曾哲與三子同席而坐。三子言志。曾哲不容以繁聲間之。故鼓瑟希也。老子第四十一章太音希聲。王弼註聽之不聞名曰希。不可得聞之音也。有聲則有分。有分則不宮而商矣。分則不能統衆。故有聲者非太音也。是此希字之義。蓋不過撫弄以寄意耳。嘗見殘本孔子

世家補

不知何人著

載入此文。注云聽之如有音如無音曰

希。時曾皙雖鼓瑟亦屬耳于三子之言。故其聲甚希簡。此說得之。譚梁生謂曾點鼓瑟蓋赤辭畢而點始鼓瑟。既終而子始問。續困勉錄謂鼓瑟希是方鼓瑟起頭。皆未得其解。閻潛邱謂曾點鼓瑟仍有口歌。蓋古人琴瑟之用皆與歌並奏。無徒瑟者。見釋地又續按此說不然。瑟亦有徒鼓者。爾雅徒鼓瑟謂之步。是也。豈有三子言志而點乃手揮口歌。嘈嘈盈耳者哉。

暮春者七句

此條有三說。鄭康成註。詠而歸。從古論作詠而饋。謂饋酒食也。論衡云。浴乎沂。涉沂水也。風諷也。咏歌饋祭也。歌咏而祭也。賈公彥疏。周禮司巫。帥巫而舞雩。引冠者五六人。童子六七人。以證。謂舞人必有童冠。此皆主雩祭者。張翠屏據項平甫說。引漢志祈穀之祭。舞以七十二人。按前後漢志無此文。不知項氏何據。冠者五六人。五六三十也。童子六七人。六七四十二也。祭而歌舞。有詠歎淫泆之辭。故曰詠而歸。蓋點欲以農事爲國。亦用世之事。此主祈穀之祭者。漢志三月上巳祓除。官民潔于東流水上。蔡邕



引此經浴乎沂爲證。此主上已被除者。按祈穀以寅月。左傳啟蟄而郊是也。雩祭以己月。左傳龍見而雩是也。皆不在暮春。惟上已被除。於暮春爲合。當從之。說見前編。按後漢書禮儀志雩祭立土人舞二佾七日一變如故事。公羊傳何休注使童男女各八人舞而呼雩。

稅畝

註

張惕庵曰。宣公稅畝。不是什而取二。註中所引杜預注。左傳之說誤也。左傳只言古者穀出。不過藉。公羊傳只言重於什一。大桀小桀也。何嘗有什二字。面穀梁傳云。非公之去公田而履畝。什取一也。是仍什一也。何嘗有

什二來古井田九百畝公田居其一以二十畝爲民廬舍君只有八十畝一井之中通力合作私田稼不善則非吏公田稼不善則非民法至善也宣公自六年至十五年九年之內三遇旱災民救死不贍只耕私田公田鹵莽滅裂所收實不供用于是另設一法將此公田也攤勻入私田之內計算凡一井共八百八十畝公收八十八畝之租名色仍是什一已多收十八畝舉成數卽二十畝二猶不足言一井九百畝已多收二十畝若真是什而取二一井之田收其一百六十畝亦不待哀公

季氏已爲陳氏矣。愚按此條殊不可解。所云將公田攤  
勻入私田內者。謂廬舍二十畝也。以廬舍二十畝攤入  
私田。則一井共九百畝。公家當收百畝。不止八十八畝  
矣。若止收八十八畝。則但多收八畝。無十八畝。蓋公田  
原自有八十畝也。據張氏說。當云將廬舍二十畝攤勻  
入私田之內。凡一井共九百畝。公收一百畝。名色仍是  
什一。已多收二十畝。如此方不錯。稅畝之說。任鈞臺  
謂躬行田畝。踏取十畝之最上者。以爲例。余前編取之。  
按漢書五行志。民患上力役。懈于公田。宣公初稅畝。就

民田畝擇美者取其什一。食貨志孟康注。稅畝春秋謂之履畝。履踐民所種好者而取之。任說本此。

子路仕輒不去卒死其難

正名章總註

胡氏謂夫子以正名告子路而子路終不喻。故仕輒不去。卒死其難。徒知食焉不避其難之爲義而不知食輒之食爲非義也。此說自朱子採入集註。數百年來衆口一辭。未有正其非者。何義門讀書記嘗論之曰。子路不去。雖乖亂邦不居之義。然謂其終于不喻則非也。其死也。仕于孔氏。則亦聞孔悝之難而赴之而已。故其言曰。

若燔臺半必舍孔叔死。悝非死輒也。先儒于此多失之。其說是已然。謂子路不去猶未悉其始末。按左傳哀十四年小邾射以句繹來奔。曰使季路要我。吾無盟矣。使子路。子路辭。季康子復使冉。有謂之。子路卒不許。此子路去衛反魯之明證也。本章問答在魯哀十年。朱註云明年冬夫子反衛。子路亦從夫子而歸矣。使子路猶在衛。魯人何從而使之。後復適衛爲孔悝家臣。大抵卽在是年。明年秋齊陳瓘過衛。子路見之。勸其善魯以待時。是冬遇蒯瞶入國。劫孔悝而與之盟。遂死其難。由此觀之。

子路蓋去衛而復適衛。其去衛者。聞夫子正名之論。知衛之不可仕也。其適衛者。應孔悝之召。非仕輒也。若謂食孔悝之祿。卽是食輒之祿。此又不然後世微員末秩。皆命于一人。古則陪隸之屬。大夫自辟除。養之以采地之祿。故曰公臣大夫。大夫臣士。儀禮喪服傳。大夫之貴臣。爲大夫服斬衰。卽以大夫爲君也。然則子路之仕衛。與輒何與哉。

莒父

莒父地無考。已見前編。郝京山云。莒父魯公邑。今山東

萊州府高密縣東南是其地。少昊之後，武王封于莒。春秋時，莒遷于城陽。魯併莒，因以其地爲莒父。愚按漢書地理志琅邪郡屬有計斤縣，注：莒子始起此。後徙莒，師古曰：卽春秋左氏傳所謂介根也。莒始都介根，在今萊州高密縣東南四十里。後遷于莒，而介根仍爲莒邑。襄二十四年傳：齊崔杼伐莒，侵介根。杜注：介根，莒邑是也。郝氏謂魯併其地爲莒父，其說無据。一說：莒繫以父。魯人語音如梁父、亢父，剛父是也。今莒州地按晉有黃父。鄭衛皆有武父。楚有冶父、城父、雞父，以爲魯人語音。

未確又云在莒州則仍是莒地當時周有莒齊亦有莒並見左傳豈必莒地而後稱莒父哉

### 桓公子糾

張惕庵曰齊桓子糾誰當立誰不當立管仲召忽當死不當死乃古今一大疑案須明辨到底聖言方有着落今以春秋爲準的取諸儒之言參證則可決其是非按春秋莊九年夏公伐齊納糾齊小白入于齊程子曰桓公兄子糾弟春秋書齊小白言當有齊國也子糾不稱子官非公之嗣子也程泰之曰糾不稱齊蒙上公伐齊



省文。非不當有齊也。小白稱齊。春秋書某國某名。本書法如此。非小白當有齊也。二說殊不易決。誰兄誰弟。三傳無明文。漢薄昭與淮南厲王書云。齊桓殺其弟。以返國。以小白爲兄。僅見于此。莊周荀卿以子糾爲兄。司馬遷趙長君韋昭皆同之。近日西河毛氏。尤左袒此言。今以春秋證春秋。桓十一年夏五月。鄭伯寤生卒。七月宋人執鄭祭仲。突歸于鄭。突。鄭莊之庶子。不宜爲君者也。蒙上文不稱鄭。仍不宜爲君者也。正與納糾文同。下云鄭忽出奔衛。上有鄭。又稱鄭。忽。鄭之世子。宜爲君者也。蒙

上文。仍宜爲君者也。正與齊小白文同。桓十五年。鄭伯  
突出奔蔡。下文又書鄭世子忽復歸于鄭。又與納糾小  
白入同。則小白之宜立明矣。淮南王。漢文帝之兄也。擅  
殺大臣于闕下。于法應死。文帝曲赦之。使薄昭予之書。  
果子糾兄。正宜直說。何用迴護。況春秋之學。由于夏五  
傳。至董仲舒。語必有所受。荀況莊周。戰國橫議之流。語  
不足信。彼云堯幽囚。舜野死。太甲殺伊尹。衛武齊桓殺  
兄而篡其國。舉不仁不義之事。加之大聖大賢。以逞其  
不平之鳴。不過云竊鉤者誅。竊國者爲諸侯而已。豈可

信之以較是非哉。再以左傳證之。齊襄公立。無常。鮑叔牙曰。君使民慢。亂將作矣。奉公子小白奔莒。亂作。管仲召忽奉公子糾來奔。是小白于未亂之先。大臣奉之以出。晉叔向亦云。高國援之于內。于倫序宜立。可知公子糾乃既亂之後。恐爲無知所殺。逃死而出。春。齊人殺無知。魯莊公與齊大夫盟于莒。夏。伐齊。納糾。至秋。猶不能入。七月。齊桓立。葬齊襄公。國有君矣。猶不知退。八月。乃與齊戰于乾時。敗績。魯莊公喪其戎路。乘傳而歸。九月。齊人取子糾殺之。是非曲直。本末昭然。是子糾不宜與

齊桓爭者也。糾旣不宜與桓爭。則管仲召忽均不宜爲公子糾死。管仲不死。義也。故夫子大其功。召忽死之。迷復也。故夫子輕其死。不然。夫子嘗言志士仁人無求生以害仁。聖言豈相矛盾哉。愚按程子與程文簡公二說以文簡言爲當。程子謂糾非嗣子。故不稱子。考孔穎達春秋正義云。定本經文糾上有子字。今本無子字。闕文觀下文書齊人取子糾殺之。孔說可信。若小白之書齊春秋又自有例。襄二十年書蔡殺其大夫公子燮。又書蔡公子履出奔楚。履非嗣子。又不當有蔡國。其書蔡以

無所繫耳。小白之書齊，正此例也。至鄭忽與突之事，與小白子糾絕不類，忽爲世子，旣立矣，突入而後出奔，小白非世子，又未嘗立，不類也。春秋書鄭世子忽，未嘗書齊世子小白，何得援以爲證乎？莊荀司馬氏皆以子糾爲兄，惟漢薄昭與淮南厲王書，有齊桓殺其弟以返國之語，韋昭云：子糾兄也，言弟者諱也。蓋文帝爲淮南王之兄。史記漢書並云文帝高祖中子淮南厲王高祖少子王入朝常謂上大兄曰：殺兄則子帝有碍，故避兄而言弟。今謂淮南王是文帝之兄，何用廻護？則并史、漢不讀矣。春秋之學，由子夏傳至董仲舒。

者公羊傳也。公羊不以桓爲兄。仲舒亦未常以桓爲兄。而云其語必有所受。吾不知其所受何語也。堯幽囚。舜野死。太甲殺伊尹。見竹書。衛武殺兄。見史記。莊子三十篇。荀子二十篇。其書具存。並無此說。何可以是以誣之。據左傳所載。小白先出。子糾後奔。不過去國有先後。何分是非。叔向言高國援之于內者。史記云。小白少好善。故高國陰召之。非以其倫序宜立也。及魯莊公伐齊。納子糾。小白自莒先入。公與齊師戰。敗績。鮑叔帥師請討。子糾乃殺之于生竇。春秋書曰。齊人取子糾殺之。取者。

取之魯也。病夫魯之爲所取也。魯不能庇糾而殺之。曲在魯。不在糾也。齊桓公有庶子六人。無虧爲長。公與管仲屬孝公于宋襄公。以爲太子。桓公卒。齊立無虧。宋襄公伐齊。齊人殺無虧。將立孝公。不勝四公子之徒。遂與宋人戰。宋敗齊師。立孝公。孝公之得立。以宋能勝齊也。子糾之不得立。以魯不能勝齊也。設宋不勝齊。孝公不得立。亦將謂齊已有君。孝公不當與無虧四公子爭乎。種種曲說。所謂強作解事者。以其說頗足惑人。故詳辨之。

許敬庵曰。呂氏春秋云。鮑叔管仲召忽相善。欲相

與定齊國。以公子糾爲必立。

愚按子糾兄也。故以爲必立。

欲共佐之。

管仲曰。不可。夫國人惡子糾之母。以及公子糾。公子小白無母。國人憐之。事未可知。不若令一人事公子小白。夫有齊國。此二公子也。故令鮑叔事小白。管仲召忽居子糾所。然則管仲鮑叔固素有安齊之志者。而各居奇貨。以觀變而俟時。檻車之囚。堂阜之脫。非畏死而偷生可知已。故孔子稱之曰如其仁。蓋非特與仲之功。而亦諒仲之心矣。愚按呂覽之說。亦見管子大匡篇。韓非子說林又云。管仲鮑叔相謂曰。君亂甚矣。必失國。齊國之



諸公子其可輔者非公子糾則小白也。與子人事一人焉。先達者相收。管仲乃從公子糾。鮑叔從小白。此蓋後人以管仲不奉小白而奉子糾。似乎無擇主之智。故造作此說。爲管仲周旋。非其實也。果爾。則小白君齊。固管仲意中事。又何爲遮道射鉤。致死于小白乎。管子又載召忽謂管仲曰。子爲生臣。忽爲死臣。忽也知得萬乘之政而死。公子糾可謂有死臣矣。子生而霸諸侯。公子糾可謂有生臣矣。死者成行。生者成名。此亦後人附會。爲管仲不死解嘲。並不可信。家語孔子荅子路。有子糾

未成君。管仲未成臣之語。

見致思篇

王肅注論語亦云。管仲

召忽之于子糾。君臣之義未正成。故死之未足深嘉。不死未足多非。顧寧人駁之云。子糾于齊未成君。子仲與忽則成爲君臣矣。狐突之子毛及偃。從文公在秦。而曰。今臣之子名在重耳。有年數矣。漢晉已下太子諸王與其臣皆定君臣之分。蓋自古相傳如此。若毛偃爲重耳之臣。而仲與忽不得爲糾之臣。是以成敗定君臣也可乎。愚按顧說良是。管仲之可以無死者。以二人皆未常受命于先君。均之非嫡嗣。小白已從國逆而立乎其位。則糾特一亡公子耳。仲雖不死。

于大義無害。此何義門任釣臺之論。較舊說爲長。

陳恒弑其君

張惕庵曰。世言孔子作春秋。絕筆獲麟。非也。哀十四年四月。陳恒執其君壬。置于舒州。六月弑之。孔子沐浴而朝。告于君。君旣不能討。則魯史不敢書。齊大夫陳恒弑其君。史不敢書。孔子亦無可筆削。故春秋但至十四年春。西狩獲麟而止。事理之不得不然。愚按此說非也。杜氏註春秋云。自小邾射以句繹來奔。以下至十六年。皆魯史之舊文。弟子欲存孔子卒。故并錄以續孔子所修。

之經則爲魯史所書明矣。若魯史不書弟子又何從而書之。王厚齋困學紀聞云。請討陳恒之年。春秋終焉。夫子之請討也。將以見之行事。請討不從。然後託之空言。此說最精。春秋不書陳恒弑君。非無可書也。不忍書耳。作者七人矣。

作者七人。包子良謂長沮桀溺丈人石門荷蕢。儀封人楚狂接輿。王輔嗣謂伯夷叔齊。虞仲夷逸。朱張柳下惠少連。鄭康成謂伯夷叔齊辟世者。荷蓀長沮桀溺辟地者。柳下惠少連辟色者。荷蕢接輿辟言者。七當爲十字。

之誤也。三說雖不同。然皆合上賢者辟世爲一章。指隱  
逸而言。趙岐註孟子云。作者七人。隱各有方。見古之應  
賢王章應  
劭風俗通云。孔子嘉虞仲夷逸。作者七人。亦終隱約。蔡  
中郎集。國叔則銘云。潔耿介于邱園。慕七人之遺風。後  
漢書。逸民傳論。絕塵不反。同夫作者。其解並同。惟橫渠  
張子。指作者之聖。謂伏羲神農黃帝堯舜禹湯。制法興  
王之道。非有所述于人也。此說恐未然。

遯伯玉

張惕庵曰。伯玉卷懷。只說進退合宜。不必指近關出奔。

一事若強臣逐君。卿大夫置身局外。便算君子。亂臣賊子。何所忌憚。夫子之贊伯玉。決不指此事也。襄公十四年。伯玉從近關出。十六年。孔子始生。何取此事而追贊之。愚按夫子之贊伯玉。雖不必專指此事。然此事關係不小。其是非豈容勿論。按雜記云。內亂不與焉。外患弗避也。註云。同僚將爲亂。已力不能討。不與而已。春秋魯公子友如陳葬原仲。傳曰。君子避內難而不避外難。以此論之。伯玉之從近關出。蓋力不能討賊。合于內亂不與之義。此所以得爲君子也。崔杼弑君而晏嬰不去。吳

光弑君而季札復位待命。聖人皆不以爲非。職是故爾。若伯玉此事果非。則大節已虧。又何進退合宜之有。孔子之生。公羊穀梁在襄公二十一年。史記在襄公二十二年。此云十六年。亦誤。

### 放鄭聲

張惕庵曰。詩惟二南。幽風正小。大雅頌入樂。餘只備諷誦。爲法戒而已。鄭詩旣不入樂。無可放。放者鄭聲也。樂記又言鄭音好濫淫志。宋音燕女溺志。衛音趨數煩志。齊音敖辟喬志。四者皆淫于色而害于德。是以祭祀弗

用也。若言詩。宋詩乃商頌。豈可放乎。緇衣見好賢之至。  
羔裘有正直之臣。鄭詩何嘗都是淫亂。愚按。謂詩除雅  
頌南豳之外。皆不入樂。此宋儒程泰之之說。著詩論百餘篇而  
顧亭林力主之。其實非也。古未有詩而不入樂者。季札  
請觀于周樂。並歌列國之風。非樂乎。魏武平劉表。得漢  
雅樂郎杜夔。傳鹿鳴騶虞文王伐檀四篇。伐檀入樂。非  
風詩乎。樂記言祭祀弗用。謂不奏于宗廟朝廷。而其屬  
于樂部。則奏之以觀民風。是亦樂也。古者四夷之樂。尚  
陳于天子之廷。況列國之風乎。商頌祭祀之樂章。此外



必更有樂。襄十年傳。宋以桑林享晉侯。其證也。宋音燕女。溺志有音。自有詩。特時王不陳其風。無可攷耳。豈專靠數篇商頌。以爲樂哉。如宋詩止有商頌。則歌商頌而有燕女。溺志之音。又斷無是理也。凡攻朱子詩傳者。皆謂聲淫。非詩淫。余前編已辨之。安溪李文貞公著詩所自序云。朱子鄭衛之說。諸儒以爲不然。今獨信之者。謂非是。不足以見亂之所生。爲二南之左契。抑雖其流至此。猶有秉禮知義。無文王而興者。夫然後可以極無邪之變矣。安溪之論如是。後學可妄置喙耶。

# 闕文

闕文有二說。穀梁傳云。春秋信以傳信。疑以傳疑。謂如甲戌己丑。夏五郭公。紀子伯。莒子盟于密之類。見聞未確。闕而不書。則文是。紀載之文。漢書藝文志云。古制書必同文。不知則闕。問諸故老。至于衰世。是非無正。人用其私。故孔子曰。吾猶及史之闕文也。今亡矣夫。蓋傷其寢不正。則文是。點畫之文。近人皆主前說。蘇子瞻葉少蘊並從漢志。當兩存之。

三桓之子孫微

張惕庵曰。三桓之微。是指未然。不指陽虎執季孫斯。哀公欲去季氏。雖無成事。然自此三家遂不振。孟子戰國策史記載魯君臣事。俱無三家子孫。此其微也。明人管登之言。禮記云。大夫強而君殺之。義也。自三桓始。也不。是如陳氏註所云。必三桓後來受誅于魯公。但古書失攷耳。政柄下移。積重不已。主上昏稚。則篡其國。王莽是也。主上力足。制之則滅其家。霍顯霍禹是也。春秋之末。魯君臣不相安。已極。若魯蒙周公之德。不至先亡。則三桓必灰飛煙滅。一定之理。觀哀公後。魯尚有國二百五

十年而三桓子孫杳無聞焉。則子孫之微自是實事。愚按此說非也。史記言悼公時三桓勝魯如小侯。卑于三桓之家。悼公薨。檀弓載孟敬子荅季昭子居君喪之語。言吾三臣者之不能居公室也。四方莫不聞矣。竹書周考王十四年。魯元公四年也。魯季孫會晉幽公于楚邱。是三桓至元公時尙存。聖人五世而失之言已不驗矣。大抵子孫微只據現在。春秋昭二十年南蒯叛季氏。定八年陽虎又叛。十年侯犯叛叔孫氏。哀十五年公孫宿叛孟氏。大夫僭而陪臣叛之。故曰三桓之子孫微。正指

其已然者以警之也。使三桓翻然悔禍。返政歸祿。乃心公家。雖與魯終始可也。聖人豈爲此逆料之辭哉。

### 博奕

奕圍棋也。其法至今猶存。文選韋昭博奕論云。一木之枰。枯棊三百。李善註引邯鄲淳藝經曰。棊局縱橫各十七道。合二百八十九道。白黑棊子各一百五十枚。是則魏晉以前。棊局止十七道。今則十九道。此爲不同耳。古之博與後世異。傳記所說亦不分明。今參考羣書。大畧可見。說文。博局戲。六箸十二棊也。十二棊六白六黑。投

六箸行六棊故謂之六博。斲木爲五子擲之。子謂之環亦曰齒

有梟盧雉犢爲勝負之采。故又謂之五木。史記蔡澤傳

云博者或欲大投。班固奕指云博懸于投。不專在行。楚

辭云篲蔽。篲竹名蔽博箸也象棋有六博。分曹並進。道相迫。王

逸註言六博以篲路作箸。象牙爲棊。投箸行棊。轉相道

迫。使不得擇行也。又云成梟而牟呼五白。註梟勝也。倍

勝爲牟。五白博齒也。言已棋已梟。當成牟勝。故呼五白

以助投也。据此諸說。則博蓋先行棋而後取決于投。以

定勝負。是以尹文子云博者盡關塞之宜。得周通之路。

而不能制齒之大小。在遇者也。此正言行。碁已勝而復以投齒之大小分勝負也。與博相類者曰塞。說文行碁相塞。謂之塞。漢書注塞博類也。不用箭。但行梟散。是則投瓊曰博。不投瓊曰塞。其異如此。

亞飯三飯四飯

周禮大司樂職云。王大食三脩。皆令奏鐘鼓。孔疏。常食亦以樂脩。但大司樂不令奏鐘鼓耳。按膳夫職云。王日一舉以樂脩食。此常食也。常食但奏琴瑟。玉藻進饌進羞。工乃升歌。疏謂進羞之後。樂工乃升堂。以琴瑟而歌。

可證。不言初飯。或云初飯不侑。降于天子。或云夫子正樂而去其一。按數終于四。則有初飯明矣。郝京山云。初飯或太師侑之。或闕人。或有人而未去。此說得之。擊磬襄。

孔子學鼓琴于師襄子。據史記是第三次適衛時事。家語師襄子曰。吾雖以擊磬爲官。然能于琴。司馬貞据此。謂師襄子魯人。卽論語之擊磬襄。按韓詩外傳云。孔子學鼓琴于師堂子京。枚乘七發云。使師堂操暢。伯牙爲之歌。韓嬰枚乘。在史遷之前。並作師堂。旣與襄異。史記



雖作襄而以學琴繫之在衛時明以師襄爲衛人家語  
晚出不足信而孔庭歷聘記謂孔子二十九歲學琴于  
師襄後攝魯相事舉爲樂官孔子以女樂去師襄亦入  
于海其說尤屬杜撰

### 孟莊子

春秋襄十九年八月仲孫蔑卒二十年春正月仲孫速  
會莒人盟于向秋帥師伐莒新安汪氏謂獻子禪而不  
縣則始不三年蓋昉于速郝京山謂親喪六月而會盟  
征伐不得爲孝其說非也汪鈍翁曰禮有之君既葬王

政入于國。既卒哭而服王事。大夫士既葬。公政入于家。既卒哭。升經帶。金革之事無辟也。今莊子未練而從政。未祥而臨戎。其殆合于禮之變與。是故經無貶辭。而莊子爲孝。孰謂莊子不三年者。不然。其能逃于聖若賢之責乎。

### 法度

閻潛邱云。一部十三經。除大禹謨。晚出。公羊傳。漢始著竹帛外。法度字僅二見。一見盤庚上。一見論語末。要二處不可同一解。論語權有五。謂銖兩斤鈞石也。量有五。

謂龠合升斗斛也。度有五。謂分寸尺丈引也。三者居治天下之大端也。昔舜一歲四巡守。皆同律度量衡。月令兩日夜分。皆同度量。正權概。周禮大行人。十有一歲同度量。同數器。大傳立權度量。商君傳平斗桶權衡丈尺。始皇紀秦初并天下。一法度衡石丈尺。蓋未有舉權量而遺夫度者。抑未有知長短而不與知輕重及多少並急者。特以度一字未足成句。配以法字。易曰制而用之謂之法是也。始皇紀按始皇紀當作律歷志師古註漢書不註史記也亦名法度。師古注邢昺疏正同中庸言天子之制度下卽驗之。

以轍迹廣狹相距如一。此真所謂度也。武王有天下初。豈容不審此。祇緣宋儒好精言性命。視此等爲粗迹。于度字別作解。按此說非是。經有並言權度量者。閻氏引尚書大傳是也。有但言度量者。王制八政度量明堂位。頒度量是也。有但言權量者。此經是也。舉度量而不及權。舉權量而不及度。省文如法度爲丈尺。則始皇紀旣云。一法度。又云。丈尺不重。杳乎愚謂法之所包者廣。如周禮所稱治象之法。敎象之法。政象之法。刑象之法。皆是度。卽大司徒以度敎節。則民知足之度。鄭註謂宮室。

車服之制宮室車服未常不以丈尺定之。然度謂等殺。非謂丈尺等殺者。朝廷之制也。丈尺是器。已包在權量中矣。周禮五服車旗宮室之禁。小宗伯辨之。衣服宮室車旗禁令。家宗人掌之。宮室車服禮儀典命掌之。其慎重如此。董子繁露度制篇云。貴賤有等。衣服有制。朝廷有位。鄉黨有序。謂之度制。則民有所讓而不敢爭。若去其度制。使人人從其欲。快其意。以逐無窮。是大亂人倫。而靡財用也。上下之倫不別。其勢不能相治。故苦亂。嗜欲之物無限。其數不能相足。故苦貧。今欲以亂爲治。以

貧爲富。非反之度。制不可蓋。度制所以辨上下。定民志。故逸周書器服解序云。車服制度。明不苟踰。作器服。用道于焉。大備。豈丈尺之謂哉。

### 繼絕世

此經繼絕世。與中庸不同。彼言懷諸侯。則爲諸侯之世。此與國對。當指世其家者言。邢疏云。賢者當世祀。爲人非理絕之者。則求其子孫。使復繼之。尙說得不分曉。按文王詩。木支百世。孔疏引許氏異義云。論語曰。興滅國繼絕世。國謂諸侯。世謂卿大夫。分別了然。又裳裳者華。

詩序云。刺幽王棄賢者之類。絕功臣之世。卽此經所謂絕世也。朱註云。興滅繼絕。謂封黃帝堯舜夏商後。則二句無分別矣。

四書典故辨正續卷四

溧陽周柄中理衷氏著

以五十步笑百步

戰敗而奔。何以止於五十步百步。五十步又何以笑百步。幼時便蓄此疑。屢舉以問前輩。大率謂不過假設之詞。無他義也。後讀司馬法仁本篇云。古者逐奔不過百步。於是百步而止。以五十步笑百步之故。始得豁然。蓋五十步猶在敵人追逐之內。未若百步而止者之怯甚也。益歎經義之難通如此。



狗彘食人食而不知檢

漢書食貨志引此文。不知檢作不知斂。云豐年斂凶年發。卽耿壽昌常平法之所由來。宋陳止齋王厚齋皆主此說。按狗彘食人食。謂以人食餒狗彘。後文庖有肥肉。廄有肥馬。卽此句之註腳也。作檢爲是。豐年斂凶年發。乃魏文侯時李悝平糴之法。歲有上中下三熟。上熟其收自四。餘四百石。中熟自三。餘三百石。下熟自倍。餘百石。小飢則收百石。中飢七十石。大飢二十石。故大熟則上糴三而舍一。中熟則糴二。下熟則糴一。使民適足。賈

平則止。小飢則發。小熟之所斂。中飢則發。中熟之所斂。大飢則發。大熟之所斂。而糴之。此卽管子國蓄篇所云。民有餘則輕之。故人君斂之以輕。民不足則重之。故人君斂之以重者。孟子所陳皆王道。豈屑此區區小補之術哉。

作俑

始作俑者。韓昌黎云。俑當作踊。言刑費則踊。象人而用之。李習之云。始爲肉刑者。仲尼猶疾之。況坐視飢民之死乎。蓋以踊指足刑言之。按檀弓云。孔子謂爲芻靈者。

善謂爲俑者不仁。不殆于用人乎哉。則俑自是木。寓人有機發面目象人形者。故曰象人而用之。韓李之說見羅莘路史注。聊以備異聞。

### 孟子見梁襄王

張惕庵曰。史記梁惠王三十五年。孟子至梁。三十六年。惠王卒。子襄王立。孟子適齊。是孟子在梁首尾未三年也。梁惠王雖虐用其民。未敢叛周。襄王元年。與諸侯會徐州。相王也。追尊父惠王爲王。是先齊秦而叛周者。梁襄王也。孟子惡而去之。非卒然一問。便可不俟終日。愚

按諸侯相王。不特見于魏世家。考田齊世家云。齊宣王九年。與魏襄王會徐州。諸侯相王也。是稱王之事。齊與魏共爲之。非梁襄一人之罪。田齊世家又云。威王二十六年。敗魏于桂林。于是齊最強于諸侯。自稱爲王。以令天下。則齊之稱王。又先于魏。孟子不以是病齊。何獨于梁襄而惡之。趙世家。武靈王五年。五國相王。趙獨否。曰無其實。敢處其名乎。令國人謂己曰君。孟子果以稱王惡梁襄。則趙武靈爲第一賢君矣。按六國稱王。史記所載互異。據田齊世家。威王二十六年。自稱爲王。則齊

稱王最先。周本紀顯王四十四年。秦惠王稱王。其後諸侯皆爲王。注謂韓魏齊趙則秦先稱王而後諸侯效尤。齊魏世家並言齊宣王魏襄王會于徐州以相王。秦本紀在惠文君四年。則齊魏稱王在秦惠王之前。秦本紀及六國年表又云。秦惠文君十三年。魏襄王十年。魏君爲王。韓亦爲王。楚世家懷王四年。秦惠文王十三年。秦惠王初稱王。則秦與韓魏又同時稱王。其異如此。可見馬遷當日已無確據。故岐出而備載之。亦史家疑以傳疑之例也。千載而下。乃鑿鑿斷之曰。梁襄稱王先齊秦而叛周。何其

立論之果耶。據魏世家襄王已于元年稱王。何以至十年又稱王。以意度之。元年相王。但追尊其父。而猶未敢自稱。至十年秦惠稱王。乃效尤耳。知此益信孟子去梁。非爲稱王先叛周之故。

海內之地方千里者九

張惕庵曰。海內之地方千里者九。約指九州也。陳新安以爲七國宋中山。按宋中山二國。安得當二千里。況中山在齊威王時。已爲魏文侯所滅。此時無中山矣。愚按趙註云。集會齊地。可方千里。譬一州耳。今欲以一州服

八州猶鄒欲敵楚也。則方千里者九。自是約指九州言。

之中山地方五百里。見秦策范。宋止五千乘。見燕策蘇。唯說秦王。代謂燕王。

豈得當二千里。惕庵之言是也。但謂齊宣王時已無中

山。卻失考。中山滅而復立。後爲趙所滅。史記六國年表。

在趙惠文君四年。齊湣王二十九年。或說以王制海

內九州方三千里。三索之得九千里。義亦與趙同。

### 文王事昆夷

湯之事葛。事見孟子。文王事昆夷。書傳無考。皇甫謐帝

王世紀云。文王受命四年。周正丙子。昆昆一作混。又作紀亦曰。吹夷。卽

犬夷也。夷伐周。一日三至周之東門。文王閉門修德而不與戰。采薇詩孔疏引之。此事昆夷之證。

### 徵招角招

秦龍光云。樂以五聲爲正。二聲爲變。缺一不可成樂。景公作樂而繫以徵角。亦猶魯史錯舉春秋之例。所以楊氏云。巡所守。述所職。省耕斂。皆民事也。故景公作君臣相說之樂。而曰徵招角招也。朱子謂其意雖巧。而未有以知其說之爲然。則固不得指煞命名之義。獨于民事有取矣。況羽亂則危。其財匱。物失其理。角徵必有怙慝。



之音。講家言民事而遺物。亦不成道理。愚按徵招角招。  
趙註但云所作樂章名。孫疏則謂徵爲事。角爲民。皆以  
招名之。亦舜作歌以康庶事。鼓琴歌南風以阜民財之  
意。此固傳會之說。無足取者。而龍光謂繫以角徵。猶魯  
史錯舉春秋之例。則更不然。四時可舉春夏以包秋冬。  
五音豈可舉徵角以包宮商羽乎。又謂言民事而遺物。  
不成道理。此語尤非。本文無羽。旣以徵角爲民事。何緣  
而兼言物乎。夫徵招角招者。樂章之名。謂徵調角調也。  
樂有五聲二變。缺一不可。樂章之詩。則各主一調。如李

賀作申胡子簾篋歌。賀問合何調。曰合善平弄是也。當日所作樂章。適合于徵調。角調。因以徵招角招名之。及奏樂。則諸音皆備。非獨于民事有取。亦非不用五聲二變。只有徵角二音也。朱子嘗言。周禮祭不用商音。樂家謂有殺伐之意。故祭不用。然也。恐是無商調。不是無商音。他奏起來。五音依舊皆在。則徵招角招之以調言。不以音言。可知矣。定調之說。或以調之首一字。首一聲。或謂每調中最高一聲。是宮聲。則爲宮調。若是商聲。卽爲商調。所謂第一聲者。乃領調之第一聲。非起調之首一

聲也。二說不同。朱子語類云。大凡押凡音律。只以首尾二字。章首一字是某調。章尾卽以某調終之。如關雎關字。合作無射調。結尾亦著作無射聲應之。葛覃葛字。合作黃鐘調。結尾亦著作黃鐘聲應之。又云。如今人曲子。所謂黃鐘宮大呂羽。這便是調。謂如頭一聲是宮聲。尾後一聲亦是宮聲。這便是宮調。宋時定調之法。蓋用前說。未知古樂又何如耳。

公劉

公劉遷幽。毛公詩傳。但云遭夏人亂。迫逐公劉。不言何

主之世。鄭康成詩譜以公劉當夏后太康時。失其官守。  
竄于幽。孔氏詩疏云。譜以公劉當太康之時。韋昭注國  
語以不窋當太康之時。不窋乃公劉之祖。不應共當一  
世。夏氏之衰。太康爲始。太康禹之孫。公劉不窋之孫。計  
不窋宜當太康。公劉應在其後。太康後有羿浞之亂。比  
至少康之立。幾將百年。蓋太康始衰之時。不窋失官。少  
康未立之前。而公劉見逐也。愚按此皆不知不窋已上  
代系中隔。說詳中庸先公條是以云然。惟婁敬謂公劉避桀居  
幽。金仁山通鑑前編因繫于桀在位二十二年甲子紀。

內此爲近之。蓋有郃始封。至不窋已十餘世。不窋至公劉三世。夏自禹至桀十七世。其代系約畧相當。故可據也。

### 率西水滸

鄭箋以水滸爲沮漆水側。余前編常舉程趙二說以獻疑。庚戌客關中。取圖經與古書合攷之。然後是非可定。蓋漆水有二。縣詩自土沮漆。此漆在今邠州。寰宇記所稱白土川者是。禹貢漆沮既從。此漆沮在今麟遊縣。流至臨潼。一名石川河者是。邠州之漆北流注涇。詩疏謂二水東

流亦過周。既非適岐所取道。麟遊之漆。遠在涇東南。流地非是。入渭亦所不由。箋說非也。趙氏以爲岐水之厓。岐水在今岐山縣北。寰宇記云。原出麟遊普潤里。東南流入漆水。亦非踰梁至岐所經涉。水滸者渭水之北厓。程氏雍錄。渭水在梁山之下。南循渭而上。可以達岐。斯言得之矣。

### 置郵

置郵之解不一。趙註置驛也。郵駟也。字書馬遞曰置。步遞曰郵。楊升庵云。置緩郵速。驛遲駟疾。置有安置意。猶

今制云日行一程。郵有過而不留意。猶今制之倍道兼行。言速馳也。古註郵訓爲駟。若是步遞。何以从馬。此從趙註之說者也。閻氏釋地續。則從字書。而以郵訓駟爲非。愚謂二說並不可以解孟子。置設也。如後漢書衛瑒傳。置郵驛之置。非輿服志三十里一置之置。蓋周以前書無所謂置者。左傳但有驛駟。而不及置。爾雅釋言。駟遽傳也。郵過也。亦不及置。至漢始有之。應劭風俗通曰。漢改郵爲置是也。呂氏春秋舜行德三年而有苗服。孔子聞之曰。通乎德之情。則孟門太行不爲險矣。故曰德。

之速疾乎以郵傳命。置郵卽以郵乃虛字耳。

廛無夫里之布。

張惕庵曰。此廛字。朱子旣云市宅之民已賦其廛。又令出此夫里之布。明是市廛。蔡虛齋疑其重複。欲指鄉農居貨之屋爲市廛。不明白。林次崖陸清獻辨其誤。亦不明白。此卽上文市廛一事而兩說也。國中有二廛。一是市廛。一是左右兩邊民居。許行願受一廛而爲氓。指民居也。此廛本無租。周官載師職云。凡國宅無征。蓋國中

之氓。非庶人在官。卽農夫二畝半在邑。與肇率車牛遠



服賈者。若家家征其夫布里布。民將去汝。適彼樂土。戰國之諸侯。亦愚不至此。惟市廛居貨。獲利稍厚。其地租物稅。本是正額。又因其不塗體沾足。曰此間師所云民無職者。令出夫布。不知貿遷有無。非不事常業也。又見其不種桑麻。曰此載師所云宅不毛者。令出里布。不知藏貯貨物之地。固不可以樹藝也。總是見其利厚。多爲條目以科斂之。本可併入前文。但有廛有征有法。又有夫布里布五者。混雜劃出另言。文勢使然。非朱註誤也。地租物稅。出自商賈。時去時來。此不毛與游手之罰。則

出于常住此廛之居民故曰天下之民少變其詞亦非  
上指商下指國中蚩蚩之氓愚按此說非是國中有市  
廛有民居之廛市廛有租民廛亦有租周官廛人掌斂  
廛布鄭註貨賄諸物邸舍之稅是市廛有租也載師以  
廛里任國中之地鄭註廛里謂民之邑居在都城者引  
遂人夫一廛田百畝爲證此民廛也載師又云凡任地  
園廛二十而一鄭註園廛亦輕之者廛無穀園少利也  
是民廛亦有租但輕耳載師又云國宅無征鄭註國宅  
凡官所有宮室吏所治者此謂公廨之屬非民廛也今

以國宅爲民廛。而云無征。錯矣。此廛字。斷指左右各三區之民居。非上文市廛。蓋氓是新附之民。其人負擔初弛。未曾受田。不當令出夫布。未遑種植。不當令出里布。戰國時亦以游惰之罰罰之。是苛政也。故曰廛無夫里之布。若廛是上文市宅。孟子卽併而言之曰。市廛而不征。法而不廛。無夫里之布。亦自明白。何必劃出另言。卽另言之。何不以類相從。次于市廛之下。而別爲第五節。考經文立言有序。前朝後市。則國中。也以次而郊關。則爲路。以次而都鄙。則爲野。又次而及于新附之氓。亦使

之各得其所。次第如此。豈容紊亂。況上云天下之商。願  
藏于其市。此云天下之民。願爲之氓。以許行願受一廛。  
而爲氓之語參看。其義顯然。朱註云。市宅。或亦泛言城  
市之宅。未必卽指爲上文之市廛也。

### 孟子處賓師之位

閻百詩云。范氏謂孟子在齊處賓師之位。非也。孟子爲  
卿于齊。孟子致爲臣而歸。烏有所謂賓師之位哉。古有  
可召之臣。有不可召之臣。孟子蓋就以不可召之臣自  
處。非眞師也。若果師。則吾聞天子不召師。而況諸侯乎。

齊王自不敢來召又不待其召而後不往也。田敬仲世家云：宣王喜文學游說之士，自如騶衍、淳于髡之徒七十有六人，皆賜列第爲上大夫，不治而議論。故孟子時爲客卿，而曰無官守言責。愚按：孟子言繼而有師命，不敢以請師命。趙註以爲師旅之命，孫疏以爲賓師之命。朱子從趙註。然揚雄解嘲云：孟軻雖連蹇，猶爲萬乘師。其說必有所據，則賓師之解自當。范說未可非也。或問：客卿卽賓師乎？曰：客卿自客卿，賓師自賓師。史記秦本紀：客卿胡傷攻魏，客卿竈攻齊。楚世家：秦遣客卿通將兵。

救楚。豈有賓師而任疆場戰鬪之事者。孟子于齊爲客卿。王高其德望。以賓師禮之。非客卿卽賓師也。知此則孟子爲卿于齊。孟子致爲臣而歸。及淳于髡所謂在三卿之中。與賓師兩不相碍矣。

孟子爲卿于齊。出弔于滕。

左傳。鄭游吉稱先王之制。諸侯去士弔。大夫送葬。惟嘉好聘享三軍之事。于是乎使卿。又曰。文襄之霸。君薨。大夫弔。卿共葬事。夫人士弔。大夫送葬。然則卿送諸侯之葬。蓋自晉文公始。如游吉言。則已過先王之制矣。滕小

國服屬于齊。不當使卿弔。此蓋孟子與滕有舊。自請于齊王而行。想當然也。

### 王驪

趙註。王驪嬖大夫。按昭元年傳。子產執子南而數之曰。子皙上大夫。女嬖大夫。而弗下之。不尊貴也。此嬖大夫對上大夫言。昭七年傳。鄭罕朔奔晉。韓宣子問其位于子產。子產曰。朔于敝邑。亞大夫也。宣子使從嬖大夫。此嬖大夫對亞大夫言。哀五年傳。鄭駟秦嬖大夫也。而常陳卿之車服于其庭。此嬖大夫對卿言。嬖大夫下大夫。

也。王驩邑大夫。故曰嬖大夫。今人作嬖倖解。恐非。

申詳

申詳卽申祥。檀弓子張病。召申祥而語之。鄭註申祥子張子。太史公傳曰子張姓顓孫。今日申祥。周秦之聲二者相近。未聞孰是。孔疏周國秦國之人言申與顓聲音相近。今不知顓是不知申是。故云未聞孰是。愚按顓孫複姓。豈可去孫而單舉一字。況父子並書。當以姓繫之。於父以檀弓書法證之。公叔文子卒。其子戌請謚于君。陳乾昔寢疾。屬其子尊已。皆上舉其父之氏。而子則但



稱其名。未有父。但稱字。而反詳其子之姓於下者。然則申祥是人名。註疏之說非也。孔叢子。衛公叔戌奔魯。謂申詳曰。吾於子思親而敬之。子思未吾察也。云云。按戌以魯定公十四來奔。時孔子年五十六。而子思已長。則孔子夢奠之年。子思幾四十餘歲矣。子思申詳與繆公同時。自定至繆。中隔哀悼元三君。凡八九十年。二人皆百餘歲。其可信乎。

晝爾于茅四句

何義門曰。下文雖云乘屋于茅。卻爲蠶事。引孔疏晝日。

爾當往取茅草。夜中爾當作索。綯以待明年蠶用爲證。  
愚按鄭箋云。女當晝日往取茅。歸夜作絞索以待時用。  
所謂時用。猶云不時之用耳。非指蠶事。蠶事之用。曲植  
籬筐。何取茅草絞索捆載之具。何與育蠶。孔疏易時用  
爲蠶用。殊非鄭意。不當從而附會之。屋是野廬。孔疏  
上云塞向瑾戶。是都邑之屋。此所治者。野廬之屋也。乘  
有二義。毛傳乘升也。鄭箋乘治也。孔疏鄭以民治屋。不  
應直言升上而已。故易傳以乘爲治。愚按毛鄭皆不言  
以茅覆屋。乘字二義並通。若用嚴華谷詩緝中以茅葢

屋之說當從毛傳作升上解。其始播百穀。鄭箋謂祈  
來年百穀于公社。孔疏引月令孟冬祈來年于天宗以  
證云播種百穀。乃是明年之事。今于十月之中。則是預  
有所營。與播種者爲始。與穀爲始。不過祈祭社稷。故知  
其始播百穀。祈來年百穀于公社。公家祭社爲祈來年  
播種百穀。故民亦治屋爲來年鋤耘而止。舍愚按箋疏  
以其始二字黏定十月說。故以爲幽公爲民祈祭公社。  
不如朱傳來歲將復始播百穀不暇治屋之說。尤爲直  
截。

國中什一使自賦

什一使自賦。先儒並云什中賦一。獨鄭康成以爲什一之中賦一。俾彼甫田詩疏云。孟子言三代稅法。其實皆什一。據通率而言耳。周制有貢有助。助者九夫而稅一夫之田。貢者什一而貢一夫之穀。通之二十夫而稅二夫。是爲什中稅一也。故鄭註冬官匠人。廣引經傳而論之云。周制畿內用夏之貢法。稅夫無公田。邦國用殷之助法。制公田不稅夫。貢者自治其所受田。貢其稅穀。助者借民之力以治公田。又使收斂焉。諸侯謂之徹者。通

其率以什一爲正。孟子云：野九夫而稅一。國中什一。是邦國亦異外內之法耳。此鄭解通率爲什一之事。助則九而助一。貢則什一而貢一。通率爲什一也。九一而助者，爲九中一。知什一自賦，非什中一者，以言九一卽云而助。明九中一助也。國中言什，乃云使自賦，是什一之中使自賦之。明非什中一爲賦也。故鄭通其率以什一爲正。若什一自賦爲什中賦一，則不得與九一通率爲什一也。愚按據康成之說，諸侯郊外郊內其法不同。郊內什一，使自賦其一。郊外九而助一，是爲二十而稅二。

通其率以什一爲正言郊內郊外相通其率爲什稅一也。以通率爲什一解徹法。又是一義。考古家亦不可不知。錄之以補前編之闕。

巨屨小屨同價

趙註。巨。粗屨也。小。細屨也。如使同價而賣之人。豈肯作其細哉。疏云。大屨與小屨同其價。則人必爲小屨而賣之。而大屨豈爲之哉。愚按。孫疏與趙註不同。註以巨爲粗屨。小爲細屨。是精粗之別。不以爲尺寸之大小。以上文例之。巨小卽大小也。大小旣謂尺寸。趙註大小謂尺寸則巨

小不容更生別解。疏說得之。但疏謂大與小同價。則又不然。陳相所云。屨大小同。則價相若者。本謂大與大同價。小與小同價。但論大小。不論精粗耳。今謂大與小同價。則并大小。不論矣。彼未嘗爲此說。而孟子乃以是闢之。豈理也哉。此言巨屨與巨屨同價。小屨與小屨同價。而不論其精粗。人豈肯爲其精者哉。就其言而折之。不是。另換一層。朱子從疏說。亦一時未暇細審爾。

詭遇

詭遇之解。趙注得之。而未詳悉。古之田獵禽獸過防者。

不逐不從奔之道也。迎面而來者不射。不誅降之義也。視其背而去者射之。射必自左。不得從右而射。自左髀達于右髀爲上殺。達右耳本者次之。自左髀達于右髀爲下殺。面傷不獻。謂當面射之。踐毛不獻。謂在旁而橫射之。二者皆爲逆射。

見車攻詩疏

今嬖奚不能應禮而射。須

王良舍御之正法。驅車就禽。彼則或從右射。或當面射。或在旁橫射。此詭遇也。趙註但云橫而射之。曰詭遇。舉其一耳。斛律金二子每令出田。還校所獲。光獲少。必麗龜達腋。羨獲多。非要害之處。光恒蒙賞。羨或被捶。人



問之曰。明月必背上著箭。豐樂隨處卽下手。數雖多。去  
兄遠矣。按嬖奚之射。所謂隨處卽下手者。故曰詭遇。  
戴不勝

孫疏以戴不勝戴盈之爲一人。勝音升。盈之其字也。此  
傳會之說。孟子逸箋謂戴不勝卽戴驩。見荀子註。愚按  
荀子解蔽篇云。唐鞅蔽于欲權而逐載子。楊倞註。唐鞅  
宋康王之臣。載讀爲戴。戴不勝使薛居州。傅王者。見孟  
子。或曰。戴子戴驩也。韓子曰。戴驩爲宋太宰。夜使人曰。  
吾聞數夜有乘輜車至李史門者。謹爲我司之。使者報

日不見輜車。見有車笥而與李史。史受笥。又戴驪謂齊王曰。王大仁于薛公。大不忍人。據其時代。當是戴驪。蓋爲唐鞅所逐奔齊也。此註兩說並列。第謂唐鞅所逐者。非戴不勝。卽戴驪耳。非以驪與不勝爲一人也。考韓非子內儲說下云。戴驪皇喜二人爭事相害。皇喜遂殺宋君而奪其政。則非唐鞅所逐。前說以爲戴不勝。差爲近之。觀呂氏春秋宋康王染于唐鞅。及唐鞅對宋王云云。淫辭篇宋王問唐鞅曰。吾殺戮甚衆。而羣臣愈不畏何也。對曰。王之所罪。盡不善者也。罪不善者。善者胡爲畏王。欲羣臣之畏也。不若無辨其善與不善。則不勝且不能善。一皆罪之。則羣臣畏矣。宋王從之。

自安其身。孟子所謂一薛居州獨如宋王何者。其言驗矣。

井上有李

郝京山云。井上道間也。古者地皆爲井。路在井間。井上種樹。周禮野廬氏云。宿息井樹是也。又云。路在井間。故謂路爲井上。周禮所謂澮上之道。川上之路也。五祀祭行。亦謂祭井。川澮卽汲水之所。冬月水王。故祭行。行者井也。愚按如郝氏之說。則井上有李。卽井田道路上所植之李樹。考野廬氏鄭註云。宿息廬之屬。賓客所宿及

畫止者也。井共飲食。樹爲藩蔽。則井爲井竈之井。非井田之井也。古者井開四道而分八宅。鑿井於中。八家共之。川澮通水之道。不近廬舍。故須井汲。若挹水必于川澮。何以云鑿井而飲乎。井樹亦非井上種樹。說文八家一井。象構韓形。徐鍇繫傳。韓井垣也。周禮謂之井樹。是井樹乃井上木欄。故鄭註云。樹爲藩蔽。非種樹于井上也。郝氏誤解周禮。遂以周禮解孟子。誤彌甚矣。

四書典故辨正續卷五

溧陽周柄中理衷氏著

商之孫子八句

其麗不億。趙註云麗億數也。鄭箋亦以麗爲數。孫疏旣引鄭說。乃又云商王之子孫雖相附麗而不足以爲強。雖數至億而不足以爲衆。以附麗解麗字則亂矣。億有二說。毛云萬萬曰億。鄭云十萬曰億。孔穎達云萬萬曰億。今數然也。傳以時事言之。故今九章算術皆以萬萬爲億。箋以詩書古人之言。故以古數言之。楚語云百姓

千品萬官億醜。皆以數相十。是億十萬也。詩內諸言億者。毛鄭各從其家。說見伐檀詩疏。朱註云。十萬曰億。從鄭說也。侯于周服。毛傳訓侯爲維。謂上帝旣命文王之後。維歸于周而臣服之。鄭箋以侯爲君。言商之孫子爲君子。周之九服中。訓侯字不同。服字之解亦異矣。趙註云。天旣命之。維服于周。與毛傳同。朱子從趙註。趙註膚大敏達也。毛傳膚美敏疾也。鄭箋云。壯美而敏。按壯卽大也。膚兼大與美二義。敏亦當兼達與疾二義。蓋助王祭祀。惟達于禮者爲能疾于事也。

有故而去

羔裘詩序云。大夫以道去其君也。鄭箋以道去其君者。三諫不從。待放于郊。得玦乃去。孔疏。大夫正法有去君之道。春秋莊二十四年。戎侵曹。曹羈出奔陳。公羊傳曰。曹無大夫。何以書。賢也。何賢乎曹羈。戎將侵曹。曹羈諫曰。戎衆而無義。請君勿自敵也。曹伯曰。不可。三諫不從。遂去之。故君子以爲得君臣之義也。曲禮云。爲人臣之禮。不顯諫。三諫不聽。于禮得去也。喪服齊衰三月章曰。爲舊君。傳曰。大夫以道去君而猶未絕。春秋宣元年。晉

放其大夫胥甲于衛。公羊傳曰：近正也。其爲近正奈何？古者大夫已去，三年待放。君放之非也。大夫待放正也。是三諫不從，有待放之禮。宣三年穀梁傳稱：趙盾諫靈公，公不聽，出亡至于郊。趙盾諫之，出至郊而舍。明大夫待放在于郊也。得玦乃去者，謂君與之決別，任其去然後去也。荀卿書云：聘士以圭，復士以璧，召士以瑗，絕人以玦，反絕以環。范甯穀梁注：君賜之環則還，賜之玦則往。用荀卿之言以爲說，則君與之決別之時，或當賜之玦也。曲禮云：大夫士去國，踰境爲壇位，嚮國而哭。三月



而復服。此箋云待放于郊。禮記言踰境。公羊傳言待放三年。禮記言三月者。禮記所言謂既得袂之後行此禮而後去。非待放時也。愚按孔疏言大夫去國之禮甚詳。而此經之有故而去。卻不得援此爲說。檀弓孔疏云喪服齊衰三月章。爲舊君凡三條。凡舊君若年老致仕。退歸在國不仕者。身爲之服。齊衰三月。并各服其母喪也。若三諫不從。待放已去而絕者。惟妻與長子服之。已則無服。若待放未去。爵位未絕。身及妻子皆爲之服。然則去仕他國已絕之後。不服舊君。而雜記云違諸侯之大

夫不反服則違諸侯之諸侯反服得爲舊君服者雜記所云謂不便其居或避仇難有故不得在國者此孟子有故而去之義疏也臣非以不合于君而去君亦未嘗絕其臣故得爲舊君反服趙註謂如華元奔晉隨會奔秦朱子謂樂毅之去燕近之比類皆未合

詩亡

嚴思庵讀詩質疑云王者之迹熄而詩亡夫詩何以作爲王迹作也文武之盛無論已幽厲失道版蕩無章然而流風遺澤故在也東遷以後寢以陵遲于時齊晉主

盟猶戴共主。方漢雖橫。尙貢包茅。或忠臣義士。慷慨而  
抒憤懣之辭。或思婦勞人。悲傷而陳危苦之語。雖非一  
軌于正。然猶羣知有王。迹未熄。詩未亡也。桓文旣沒。中  
國無霸。于是郊廓大鼎。狡啟于荆尸。馮汭遺封。下夷于  
九縣。齊人類于禽獸。毀冠冕于泥塗。雖有志士仁人。無  
所施忠言。讜論無所用。哭泣之不可。轉爲嘻愉。呼號之  
不聞。安于閔默而已。迹旣熄。詩旣亡矣。聖人傷之甚。懼  
之甚。于是假魯史以立文。奉天子以行事。或筆或削。或  
子或奪。弑君篡國者必誅。僭王猾夏者必黜。而後天子

之位尊。而後中國之體正。而後亂賊之罪彰。此聖人撥亂之大法。實聖人救世之微權也。譬之有人焉。身不爲善。始則父兄教戒之。譴呵之。繼則親黨誚讓之。閭里訕斥之。終于不悛。則士師之法治之。束之以三木。麗之以五刑。而其人乃懼而悔。悔而改矣。春秋與詩猶是也。詩之意婉。而春秋之法嚴。詩以刺譏諷諫。存王迹于旣湮。春秋以筆削褒誅。扶王迹于已墜。其致一。其用殊。春秋所以繼詩亡而作。詩不亡。春秋不作可也。蓋自文武降。而至于春秋。五百餘年之間。詩未嘗亡也。楚莊入陳。殺

徵舒而夫子刪詩止此矣。是之謂詩亡。愚按呂東萊謂變風終于陳靈而詩遂亡。鄭夾漈謂美刺之詩亡而褒貶之書作。此條蓋祖述其說。竊以爲不然。周自東遷以後。天王守府。夷于列國。僖襄之世。齊晉代興。名爲尊周。而周室益弱。號令不出于境內。王迹之熄久矣。其時列國雖有詩。如木瓜。美齊。渭陽。思晉。皆與王迹無預。卽有忠臣義士。抒憤懣之辭。思婦勞人。陳危苦之語。亦猶病者之自爲呻吟而已。譬之父兄不能懲治其子弟。雖有親黨之誚讓。閭里之訕斥。曾何補于其家教哉。故曰王

者之迹熄而詩亡。至于中國無霸。楚莊入陳而變風終焉。則不但王者之迹熄而霸者之迹亦熄。姜西溟有此說見湛園集

論王風篇

此天下之又一變也。謂王迹至是始熄非也。

春秋

黃梨洲曰。春秋之不明久矣。先儒亦多有辨說而終無至當歸一之論。則以不得夫子作之之法也。春秋雖因于魯史。然魯史之所載其事煩矣。夫子取其非常者而書之。其常者聽其自爲魯史。魯史初不因夫子而廢也。夫子之春秋亦如後世大事記之類。所謂筆則筆削則

削者其筆者卽今之春秋是其削者魯史不爲夫子所  
取者是其于魯史舊文未嘗有所損益先儒以爲于魯  
史全文有筆而無削其所筆削者在名稱詳畧之間以  
一字寓其褒貶然有此然而彼不然者不能不附會穿  
鑿以求之此不知當日之作法者一也春秋雖因于魯  
史然亦有魯史所不書者則取列國之史以書之孟子  
言晉之乘楚之檇杙魯之春秋一也其事則齊桓晉文  
其文則史孔子曰其義則丘竊取之矣竊取者取之以  
入所作之春秋也董狐南史皆晉楚之良史如趙盾弑

其君此乘中之書法。崔杼弑其君。此禱杙之書法。南史楚史

官執簡而往書齊國之事。夫子因而書之。若謂由于赴告。此時弑君

者方當國。其國之太史且見殺。孰敢以之告鄰國乎。故

凡列國之事。無當于魯者。未必爲魯史所書。夫子皆取

之于列國之史者也。而謂一一由于赴告。此不知當日

之作法者二也。

南雷文定陳同亮刻胡傳序

愚按此論亦有見。然恐

未確。夫子果于魯史所載。取其非常者書之。而去其常

者。則如夏五郭公之殘闕。何關大事。乃不削而去之。而

猶存其文于簡策。此于魯史未嘗有所去取之驗也。至



于魯史原文。夫子有仍其舊者。亦必有加點竄者。先儒說經拘于義例。誠不免附會穿鑿之失。然謂于魯史舊文全無損益。又未必然也。崔杼弑君。太史見殺。當時或但以君薨告。不敢以弑君告。而魯史正其爲弑。此卽魯史之書法矣。何必取之于列國之史乎。齊陳恒弑簡公。孔子告于哀公曰。陳恒弑其君。請討之。此亦孔子正其爲弑耳。在齊人亦未必以弑君告也。況列國之史。夫子何由一一寓目。緯書雖有使子夏等求得百二十國寶書之說。要亦未可據信耳。

公行子有子之喪

荀子大畧篇公行子之之燕遇曾元于塗。郝京山据此謂子之卽燕相子之。氏公行蓋公行子之尊屬也。嘗爲燕君。燕亡。逃歸齊。死。齊王以寄公禮葬。故朝臣往弔。愚按齊之伐燕。國策及史記燕世家並云齊勝燕。子之亡而史記年表云。君噲及太子相之子皆死。竹書云。齊人擒之子醢其身。何得歸齊而爲寓公。疏云。喪其子。故有子之喪。蓋喪必有主。小記云。父主子喪而有杖。又奔喪云。凡喪父在父爲主。時公行氏喪子。身爲喪主。以受賓。

弔。故曰有子之喪。京山謂大夫喪子。不得講朝廷之禮。不知周禮卿大夫之喪。肆師相其禮。職喪以國之喪禮。泣其禁。令序其事。故云朝廷。疏說是也。俗解謂有人子之喪。則謬耳。襄十四年傳。會于向。將執戎子駒支。范宣子親數諸朝。杜注。行之所在。亦設朝位。魏鶴山云。此如孟子所謂朝廷。

### 負芻之禍

趙註。有作亂者曰負芻。來攻沈猶氏。蓋以負芻爲人名。疏云。有寇賊自負其芻草來攻。此何說也。左傳。楚燕卻

氏。或取一編管。或取一秉秆。豈作亂者用火攻。故負芻草耶。竊疑負芻當是人名。春秋有曹伯負芻。史記有楚王負芻。戰國策有魏公子負芻。疏說非是。

### 少艾

艾訓美好。集註本之趙氏。孫季昭示兒編駁之云。徧攷載籍。並無艾爲美好之說。少當音上聲。艾讀如夜。未艾之艾。艾之爲言止也。言人知好色。則慕親之心稍止也。此說固不可用。顧仲恭講四書隨筆。謂古人呼男色爲艾。引左傳既定爾婁豬。盍歸吾艾。緱國語國君好艾大

夫殆好內適子殆戰國策魏牟謂趙王曰今爲天下之  
工而王不以與工乃與幼艾爲證愚按國策之幼艾指  
建信君此是男色若艾豸杜註云艾老也豸牡豕也以  
喻宋朝好艾韋註云艾當爲外聲相似誤也好外多嬖  
臣也韋杜去古猶近若艾爲男色豈得不知而一以爲  
老一以爲誤字並不作男色解顧說亦未確此等但以  
意會可也

禹薦益於天七年

竹書禹卽位二年咎陶薨八年春會諸侯于會稽秋八

月帝陟是臯陶薨而後薦益。自二年至八年正合孟子七年之數。史記夏本紀云禹舉益任之政十年或并居喪言之可耳。其敘之東巡以前不無少誤。路史謂益先禹死無薦益七年之事。而以孟子之言蓋爲辨士設豈其然乎。

屈產之乘

漢書地理志河東郡北屈縣師古注卽晉公子夷吾所居。劉昭後漢志注杜佑通典並云晉有屈產之乘卽此。樂史寰宇記晉石樓有屈產泉相傳昔有曰馬母飲茲

泉生得龍駒。春秋傳晉屈產之乘。蓋此地所生良馬也。愚按。據劉昭杜佑說。則屈產是屈地所產之馬。今山西蒲州府吉州是。據樂史說。則屈產是地名。在今山西汾州府石樓縣。二說不同。閻百詩謂石樓乃漢西河土軍縣。非北屈地。而斥樂史爲傳會。然趙岐注孟子。何休注公羊傳。並以屈產爲地名。則樂史之說。亦自有本。當並存之。

垂棘

垂棘。孟子注及左傳公穀注並云地名。而不詳其所在。

按山西澤州府志云垂棘在府治東北三十里高都村古晉城縣遺址也。村南不半里垂棘洞在焉。內有石堅而潤瑩澤而光潔。又云東漢志高都博物記曰縣南地名卽垂垂棘之壁出此。今有巖洞大石自閉。按高都之垂不名垂棘。漢志亦不言產玉。此後來附會之說不足據也。

費惠公

王厚齋金仁山並謂費惠公卽魯季孫之後僭稱公者。張惕庵駁之曰魯自哀公後尙傳世二百六

按自哀公元年至頃



公二十五年滅于楚。凡二十年而後滅于楚。三桓之後。百四十六年。六當作五。泯然無聞。未必據有費邑矣。愚按竹書周考王十四年。魯季孫會晉幽公于楚邱。此魯元公時事。正子思同時。彼公然出而與晉侯會。其強可知。惕庵謂此時已無季氏未之攻耳。

### 鼎肉

鼎肉。趙註無解。郝京山云。肉烹于鼎者。儀禮有飪鼎熟肉也。有腥鼎生肉也。愚按禮記少儀云。其以鼎肉則執以將命。孔疏鼎肉謂牲體已解。可升于鼎者。則是生肉。

如牛肩臂。臠折九箇。羊肩七箇。豕肩五箇之類。以其可升於鼎。謂之鼎肉。非鼎烹之肉也。

弟爲尸

弟爲尸。此弟乃從昆弟。非同產弟也。何以知之。古禮祭外神。尸不必同姓。傳記稱舜祀唐郊。丹朱爲尸。周公祭天。太公爲尸。周公祭太山。召公爲尸。晉平公祀夏郊。董伯爲尸。是用異姓也。宗廟之祭。尸必用同姓。于同姓之中。用其適者。故鄭康成祭統注云。必取同姓之適。士虞記注云。尸配尊者。必使適也。若同產弟。則兄爲長。適不

當以弟爲尸。故知只是從昆弟耳。見時文有用同氣塤  
簾語者。聊一論之。

子都

子都備考以爲鄭公孫閱。愚按趙註云子都古之姣好  
者。引詩不見子都。乃見狂且。初不指爲公孫閱。孔穎達  
詩疏云。都謂美好。而閑習于禮法。二章不見子充。毛傳  
子充良人也。鄭箋忠良之人。孔疏充是誠實。故以忠良  
言之。然則子都子充皆稱美之詞。並非人名。卽以爲人  
名。亦必古人。而非公孫閱。此詩小序云刺鄭忽。忽與公

孫閱同時。鄭人作詩而津津于同時之美男子。豈不棄耶。況公孫閱之美。又何所據耶。

狼疾人

趙註謂醫養人疾。治其一指。而不知其肩背之有疾。以至于害之。此爲狼藉亂不知治疾之人。此說固難通。朱子云。狼善顧。疾則不能。故以爲失肩背之喻。按狼猛而敏給。能自顧其後。故書傳多稱狼顧。而疾則不能之說。則朱子以意言之。非確解也。一云狼疾猶狼藉其說亦本趙註。按釋文云。狼藉草而臥。去則穢亂。爲狼藉。爾雅

翼狼貪聚物不整。故稱狼藉。此與失其肩背之義全不合。陸陶山埤雅引孟子此文而說之曰。狼性貪暴。爭食以養口體。而常以害其身者。此說最善。狼貪以忘身。養口腹之人。以小害大。有貪饕之病。故曰狼疾人。猶戰國策云有竊疾也。

儲子得之平陸

四書釋地續曰。平陸今爲汶上縣。去齊都臨淄凡六百里。而儲子旣相。必朝夕左右爲王辦政事。非奉王命。似亦未易身出郊外。何以孟子望其身親至六百里外之

下邑。方爲禮稱其幣。今解不出。旣思范睢列傳云。秦相穰侯東行縣邑。車騎至湖關。湖今閔鄉縣。去秦都咸陽亦幾六百里。是當日國相皆得周行其境之內。非令所禁也。故曰儲子得之平陸。愚按儲子爲相。得巡行國中。本趙岐舊註。越絕書。周公避位出巡于邊。則自古有然。不特范睢傳可證。

公儀子

陳幾亭云。魯所以滋削之故。正以公儀休爲相。子思爲臣耳。休蓋一清廉剛決之士。見義未精者也。其於平易

近民。因時制宜之意。大抵疎邈。設令相子思。而居休于坐鎮羽儀之地。魯其不日競乎。又云。公儀休不知何如人。觀其相魯而國滋弱。又不舉子思自代。識度猷爲畧可見矣。至董生所稱出其妻事。尤爲不經。與孔子稱公父文伯之母何其反耶。愚按史記循吏傳。稱休爲魯相。奉法循理。無所變更。百官自正。說苑又載其池淵不稅。蒙山不賦。苛令不布。已閉心何閉門之語。此亦可謂平易近民。因時制宜者矣。孔叢子稱休砥節勵行。樂道好古。恬于榮利。不事諸侯。子思與之友。穆公因子思欲以

爲相。子思曰。君若飢渴待賢。納用其謀。雖蔬食水飲。仍亦願在下風。使休之才。不足以治魯。則子思之言。不幾于欺其君乎。至所傳出妻事。亦非不經。彼旣令食祿者。不與下民爭利。受大者不得取小。見循吏傳而其家首自犯之惡。得不怒。敬姜所云織元紵。紵成。大帶祭服者。效其婦績。以共祭祀而已。非與民爭利。而休之家織布好。語見循吏傳董仲舒傳則云織帛好者。人以爲好。是奪民之利。令無所售其貨也。觀孔子以妾織蒲。譏臧孫。則知休之事。不爲過幾亭之論謬矣。



燔肉不至

燔肉不至。史記云郊祭之膳俎。趙註云祭于宗廟。二說不同。愚按腥曰脔。熟曰膳。祭天地社稷主腥。故傳曰受脔于社。祭宗廟主熟。故詩曰燔炙芬芬。經言燔肉。當是祭于宗廟。但古祭天之禮有二。冬至圜丘之祭。以天道事之。則藁秸以爲席。陶匏以爲器。繭栗之牲。掃地而祭。所以尊之也。季秋明堂之祭。以帝道事之。則牛羊以爲牲。簠簋以爲器。鼎俎之寔。其薦用熟。所以親之也。魯人之郊。乃孟春祈穀之祭。說見論語魯之郊禘條其禮殺于圜丘。故

得薦熟而有膳俎耳。然則郊祭廟祭二說皆是。當並存之。助君祭士以下必自徹其俎。大夫以上則使人歸之。故曰膳肉不至。見儀禮特牲饋食疏。

孔子不稅冕而行

首服以冕爲尊。大夫元冕。惟助祭于君則服之。其家祭惟得用弁而已。禮運云。冕弁兵革藏于私家。非禮也。是謂脅君。周官司服。凡大祭祀大賓客。共其衣服而奉之。其文繫孤卿大夫士之後。則大夫士之上服皆臨事授于有司。不得家藏而私用之。其嚴如此。就使春秋之世。

此禮已不行。亦必無去國之臣。可以戴冕而行。若是其褻者。按禮。祭祀畢。歸助祭者之俎。俎者所以明祭之必有惠也。貴者取貴骨。賤者取賤骨。貴者不重。賤者不虛。示均也。此祭統之第八倫。所謂見政事之均者。至此而祭祀之禮終。始釋冕服。今燔俎未致。尙非稅冕之時。而孔子卽行。旣行而後使人歸冕于公。所謂不稅冕也。趙註云。反歸其舍。未及稅冕而行。出適他國。似孔子戴冕出國門者。此不達于禮之說也。

官事無攝

官事無攝。非謂官少事多。以一官兼數事也。春秋侯國。

官制僭踰。宋以王者之後。設六卿。復有太宰少宰。見成十年

傳晉作六軍。以卿爲軍將。又有太師太傅孤卿之官。見文

六年鄭亦有六卿。又有太宰。見襄十一年傳魯文公時。臧孫辰。

公子遂。公孫敖。叔孫得臣。季孫行父。叔彭生。六卿並見。

春秋非命成二年書季孫行父。臧孫許。叔孫僑如。公孫卿不書。

嬰齊帥師。四卿並見。會葵邱時。此等雖未見于經傳。然

羽父求爲太宰。在隱公之世。且官事不攝。夫子以譏管

仲。則其時官制無度。亦可知矣。繩以先王之法。豈不議。

減而反議增耶。所謂官事無攝者。諸侯有事于天子。必  
使命卿以往。禮也。晉使鞏朔獻齊捷于周。王謂其未有  
職司于王室。杜注鞏朔上軍大夫非命卿靈王之喪。鄭上卿有事。使  
印段往。伯有曰弱不可。杜注印段年少位卑此皆攝卿從事。非所  
以尊王。故申官事無攝之禁。官事謂官之有事于王室  
者。無攝謂無以大夫攝卿也。若如舊說。以一官攝數事。  
則于春秋時事不合矣。

取士必得

再命既言尊賢育才以彰有德。此取士當指貢於王國。

者言禮記射義古者諸侯歲獻貢士于天子。天子試之於射宮。其容體比于禮。其節比於樂。而中多者得與於祭。中少者不得與于祭。數與于祭而君有慶。數不與于祭而君有讓。數有慶而益地。數有讓則削地。尚書大傳諸侯之于天子。三年一貢士。一適謂之好德。再適謂之賢賢。三適謂之有功。有功者天子賜以車服弓矢。號曰命諸侯。其有不貢士。謂之不率正。一不適謂之過。再不適謂之傲。三不適謂之誣。誣者天子絀之一絀以爵。再絀以地。三絀而爵地畢。周禮司土凡邦國三歲則稽士

任而進退其爵祿。雜說此稽諸侯貢士之賢否以行賞罰。後漢書左雄傳古者諸侯歲貢士進賢受上賞非賢貶爵土所謂取士必得指此如作得人以為己用則與尊賢二句無分別矣。

無有封而不告

安溪李文貞公謂無有封而不告繫在交鄰之後蓋存亡繼絕如城楚邱之類非指本國臣下此說固然而義尚未備當兼封國與封爵言之城邢城楚邱此封國也邾與小邾皆附庸之國前此未爵春秋但曰邾儀父邾

犁來而已。莊十六年書邾子克卒。杜註齊桓請王命以爲諸侯。僖七年書小邾子來朝。杜註始得王命而來朝。蓋亦齊桓請而封之也。此封爵也。邾京山以封爲窆。引禮記懸棺而窆以證。謂諸侯告薨則同盟皆弔。五月而葬。則同盟皆會。有賵有贈有送。封必告死。葬相助也。此解非是。

魯欲使慎子爲將軍

張惕庵曰。明人曹石霞論此章云。魯爲齊弱久矣。本不敢覬覦齊地。時值燕昭王復仇。樂毅下齊七十餘城。惟



卽墨聊城未下。魯于此時欲乘釁而動。取南陽之地。其說恰中情理。蓋慎子亦非愚無知。齊若無釁。豈敢妄動。不知後來樂毅奔趙。齊地盡復。若田單破燕之後。率強兵責取南陽。魯將何以待之。小人謀國。但見目前。往往如此。愚按樂毅破齊。在周赧王三十一年。孟子之卒。史記索隱謂在周赧王二十六年壬申。雖未必確然。卒于樂毅破齊。齊湣王未死之前。無可疑者。魯雖弱小。常敗齊于平陸。又伐齊入陽關。並見田齊世家豈皆乘釁而後動哉。石霞之說。張惕庵謂其恰中情理。皆失之。不考。

田疇

趙注、疇、一井也。疏、說文云、疇、耕治之田也。不知一井何據。愚按賈逵國語注、田一井爲疇。李善文選注引之。而疏以爲無據。何也。若杜預左傳注、竝畔爲疇。韋昭齊語注、穀地曰田。麻地曰疇。顏師古漢書蕭望之傳注、美田曰疇。說皆有本。以對稅斂。則韋說可用。

子莫執中

趙註、子莫魯之賢人。郝京山云、詳其文義、圓上文楊墨稱子。而此指儒者爲子也。莫、勿也。戒辭。亦疑辭。如文莫。

吾猶人之莫言儒者學聖人之道。聞執中之訓。鑒二家之偏。得無就爲我兼愛之間。而守之爲執中乎。子亦莫須執中也。愚按子莫爲魯賢人。則亦當世指名之士。以道術鳴者。而荀子非十二子篇。歷舉它黨。魏牟、陳仲、史、墨、翟、宋、鉞、慎到、田駢、惠施、鄧析、子思、孟軻、莊子、天下篇。歷舉墨翟、禽滑釐、宋鉞、尹文、彭蒙、田駢、慎到、關尹、老聃、惠施、桓團、公孫龍。皆不及子莫。他書亦不一見。趙註臆度言之。無所攷据。郝解可備一說。

放飯流歠

鄭康成註曲禮放飯謂去手餘飯于器中人所穢趙註以流字例之解作大飯趙註是也按禮記少儀云侍食于君子毋放飯毋流歠小飯小口而飯而亟之疾咽小飯與放飯對則放飯爲大飯明矣大飯長啜飲食入口多而欲速貪饕之狀失禮之甚者方望溪禮記析疑云放飯者餘粒散布流歠者餘瀝沾漑此與鄭趙二說又異果爾則猶是小失禮非此處確義

二女果

趙註訓果爲侍集註因之郝京山云果與裸同通作灌

進酒也。周禮大宗伯職云：大賓客則攝而載果。天子大  
祭祀賓客，王正裸，后妃亞裸。詩云：厥作裸將，酌酒獻尸。  
曰裸獻賓客。亦曰裸。禮記投壺云：奉觴賜灌，卽果也。愚  
按周禮宗伯肆師之文，裸皆作果。郝解不爲無據。然裸  
以行禮，此言其富貴之樂，與被袵鼓琴一例，未必以行  
禮言。蓋果與嫫通。女侍曰果，卽所謂妻帝之二女者。趙  
註是也。而孫疏非之，以果字屬下句，訓爲果實之果，謂  
實若固有之也。成何句法。

若崩厥角稽首

若崩句絕。自上墜下曰崩。言商人四體投地若崩墜然。  
尙書大傳云。紂之卒幅分。紂之車瓦裂。紂之甲如鱗下。  
賀于武王。卽若崩之謂也。厥角稽首。趙注云。厥角叩頭。  
以額角犀厥地。漢書諸侯王表。漢諸侯王厥角稽首。注。  
應劭曰。厥者頓也。角者額角也。稽首首至地也。晉灼曰。  
厥猶豎也。叩頭則額角豎。師古是兩說訓厥字小異。其  
爲頭角叩地則同。自後文人承用如邱遲與陳伯之書。  
朝鮮昌海。厥角受化。王融曲水詩序。屈膝厥角。請受纓。  
縻。陸倕石闕銘。屈膝交臂。厥角稽顙。如厥爲語助。而若

崩與厥角連文何以不曰崩角而曰厥角乎後人誤據  
偽泰誓若崩厥角之文以讀孟子遂致句義俱舛

山徑之蹊間介然

趙註山徑山之嶺有微蹊介然人遂用之不止則蹊成  
爲路疏云山嶺有微蹊其間之微小介然而已此以介  
然屬上讀是微小意朱量補之新城遊北山記稍西一  
峯高絕有蹊介然僅可步語本此北宋時朱註未出猶  
從趙讀也朱子以介然屬下爲句作倏然解按易繫辭  
云憂悔吝者存乎介介際也楚辭悲江介之回風亦邊

際之義他若纖介一介皆謂微小無作倏忽解者似從

趙註爲長馬融長笛賦云介間無蹊人迹罕到介間本此

焉之聲

舊解以聲爲樂聲按聲者鐘也考工記鳧氏爲鐘其前

文總敘攻金之工一節則云鳧氏爲聲鄭註聲鐘淳于之屬淳于亦鐘

類鳧氏不爲他器而前曰聲後曰鐘此聲卽鐘之明證

惟聲卽是鐘故下文直曰以追蠡不更出鐘字若統論

樂聲而驗之以鐘則當云以鐘之追蠡矣

益成括



朱竹垞孔子門人考。晏子春秋。景公宿于路寢之宮。夜分聞西方有男子哭者。公悲之。明日朝。問于晏子。晏子對曰。西郭徒居布衣之士盆成适也。父之孝子。兄之順弟也。又嘗爲孔子門人。今其母不幸而死。祔柩未葬。家貧。身老子孺。恐力不能合祔。是以悲也。公曰。子爲寡人弔之。嬰往弔。咎公不辱臨。公使男子袒免。女子髮笄。開凶門而迎适。則适乃與景公同時。不當與孟子弟子之列。宋配祀孟子。追贈萊陽伯。孫宣公言。括嘗欲學于孟子。亦疑辭也。愚按。晏子春秋之盆成适。與齊景公同時。

固不得爲孟子弟子。而孟子時自別有一盆成括。應劭風俗通云。盆成括仕齊。其子避難。改氏成。此則孟子所稱仕齊見殺之盆成括也。朱配祀孟子者。孟子時之盆成括。非景公時之盆成适。古來同姓名者多矣。安見春秋戰國不當有兩盆成括耶。且攷孔叢所載夜哭者。乃盆成筐。事晏子。春秋作盆成适。或是誤文。不可以此疑孟。

### 羊棗

何義門謂羊棗非棗。蓋柿之小者。余已採其說。近復細

攷之按司馬相如子虛賦。楸梨。栲栗。張揖曰。栲栲棗也。李善注。說文曰。栲棗似柿而小。名曰栲。顏師古漢書注。亦謂栲棗卽栲棗。齊民要術。柿有小者栽之。無者取枝于栲棗根上插之。此又與義門其樹再接成柿之說合。則羊棗卽栲棗矣。又左思吳都賦。平仲。楸。栲。注。楸。栲。柿之小者。司馬溫公名苑。楸。栲。子似馬奶。卽今牛奶柿。正字通謂楸。栲。卽栲棗。蘇頌圖經。一種小柿謂之栲棗。俗呼牛奶柿。李時珍曰。小員如指頭。大者名丁香柿。廣志。栲棗卽丁香柿。此則義門所謂柿之小者通得棗名。不

必卽一物要亦羊棗類也。